


PS dup ()



FOPELA STRONGPELA TOK



MISTA BOYAMO SALI i bin tokim ol Simbu olsem taim em i opim konprens bilong ol:

"Yupela i no ken ting long namba wan de bilong Desemba bai olgeta samting i senis. Nogat.

"Yupela i no ken ting long las de bilong Novemba bai yumi mekim ol wok bilong nau, na long neks de, namba wan de bilong selp gavman, bai olgeta samting i narakain. Yumi no ken ting bai wantu olgeta haus i gat rup kapa, na olgeta man bai putim su na siot na nektai, na bai ka i wet i stap ausait long haus bilong yumi wan wan. Nogat tru.

"Na yupela i no ken ting tu bai ol haus sik i pas na olgeta skul tu i pinis na bai i no gat elektrik moa long taun.


"Wanem samting tru bai senis? Insait bilong yumi. Yumi fri.

"Yupela ol kaunsila i no laikim waitman i go bosim famili bilong yupela. Em i no inap; em i no save. Olsem tasol em i no ken bosim ples na kantri."

Taim MICHAEL SOMARE i toktok wantaim ol loman i kibung long Port Moresby em i bin autim laik bilong em long ol lo bilong Papua Nu Gini.

Em hia sampela tingting bilong em:

- 1.) Mipela laikim ol lo bilong mipela stret na i no bilong Australia o Amerika o Saina.
- 2.) Man i mas kot kwik-taim; em i no ken wet.



3.) Man i mekim rong em i mas kisim strafe tru na em i mas pilim; na ol man i mas lukim lo i no pilai nating.

4.) Long pasin bilong mipela, bekim em i no samting bilong wanpela man tasol; em i samting bilong lain na famili bilong em.

5.) Mipela i mas gat narakain lo bilong ol liklik bisnis.

6.) Ol lo bilong graun i mas bihainim pasin na tingting bilong dispela kantri.

7.) I gut ol lokal gavman kaunsil na ol bikpela man bilong ples i stretim ol rong bilong ples.


8.) Gavman i mas gat moa lokal loman.

MISTA BILL MORRISON, Minista bilong ol Teritori bilong Australia, i sanap long dispela kibung bilong ol save-man bilong lo long Port Moresby na em i autim sampela strongpela tok i kam long ol Papua Nu Gini. Em hia:

- a.) Yupela Papua Nu Gini i gat liklik mani na planti wokman. Yupela i ken go het sapos yupela painim wok bai planti pipel i ken winim mani.
- b.) Papua Nu Gini em i kantri bilong wok gaden na wok didiman. Dispela kain wok i mas go het.
- c.) Yupela i no ken ting bai Australia i givim nating mani long yupela. Nogat; pastaim yupela i mas soim yupela i laik mekim wanem samting long dispela mani.

Taim bilong presen nating em i pinis nau. d.) Australia i laik bai yupela i painim planti arapela pren tu.

Mipela i laik bai planti arapela kantri wok wantaim bilong kirapim olkain bikpela wok long dispela kantri.



MISTA BILL MORRISON

MISTA MATIAS TOLIMAN na namba tu hetman bilong Konstitusenel Plening Komiti, PATER JOHN MOMIS, tupela i bin tok kros long pasin bilong Mista Morrison na bilong sampela man insait long ofis bilong Mista Somare.

Tupela i tok ol man hia i strong tumas long bihainim laik na tingting bilong Australia tasol. Ol i strong tasol long pinisim laik bilong ol, maski long tingting bilong ol man i hatwok tru long wokim nupela konstitusen o as lo bilong Papua Nu Gini.

Sampela man bilong komiti hia i les pinis na i laik lusim komiti nau. Ol i no laik tru. Maski tupela pesman bilong komiti i no stap na tokman bilong Nese nel Pati na Pipels Progres Pati na ol lida bilong Koalisen Gavman, Mista Morrison i strong long ol i putim kibung. Em i win; mipela i lus.

OL MAN I WINIM MANI:

Erapai
Kandep/W.H.D.

James Suky
Lae

Elias Saimel
Suain/W.S.D.

Joseph Yanga
Mt. Hagen.

Marin Kurkur
Manus

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

OLGETA Y.C.O. BUNG WANTAIM

Dia Edita.- Mi wanpela yangpela man long kantri bilong yumi Papua Nu Gini. Mi bin ritim wanpela hap nius long Wantok, na mi bin amamas long en.

Dispela liklik nius i bin toksave long bikpela miting bilong Y.C. long Alexishafen. Mi pilim olsem, dispela kain kibung i gutpela tru.

Mi tu mi wanpela memba bilong Y.C. long wanpela hap bilong Rabaul long Katolik Sios. Mi save amamas sapos mi save lukim ol yangpela manmeri i save bung wantaim, long mekim kibung o miting na toktok long sampela samting.

Mi pilim olsem i isi tru long ol long toktok bikos, sampela taim sapos ol i kibung wantaim ol lapun o ol bikpela man, ol i save sem long autim tingting bilong ol.

Mi ting olsem long Papua Nu Gini, ol Pater na ol Minista, na ol Paste ol i mas kirapim Y.C. Long Y.C. tasol ol yangpela manmeri i ken pait wantaim toktok na ol i ken skul long autim tingting bilong ol. Na bihain sapos wanpela bikpela kibung o miting ol i mekim long misin, ol dispela manmeri inap long autim tingting bilong ol tu.

Mi ting tu olsem, Y.C. i ken strongim dispela hap tok yumi save bilasim maus bilong yumi long em Bung Wantaim.

Sapos olgeta memba long olgeta Y.C.O. long

Papua Nu Gini i save gut tru long mining bilong Y.C. inap yumi ken bung wantaim long gavman bilong yumi na olkain lotu bilong yumi.

L. Sapalik D.F.C.M.
Kimbe/W.N.B.D.

LAIKIM PEN PREN

Dia Edita.- Mi laikim pen pren long dispela kantri bilong yumi Papua Nu Gini o long ol arapela kantri.

Em hia nem na adres bilong mi:

Raphael Cassy,
Fatima High School,
P.O. Box 67,
Banz. W.H.D.



KIRAPIM PISIN SKUL

Dia Edita.- Mi laik autim wari bilong mi long niuspepa Wantok nau.

Tingting bilong mi i olsem, long Papua Nu Gini ol i save long Tok Pisin, tasol sampela manmeri ol i save rit na rait long Tok Pisin.

Sampela ol i save long Tok Pisin, tasol ol i no save inap long

raitim. Long wanem ol i no skul long rit na rait bipo.

Olsem na yupela lida ol bosman yupela i mas tingting na kirapim ol Pisin Skul na helpim kantri bilong yumi Papua Nu Gini i mas i go antap.

Yupela tingting Papua Nu Gini i gat 18 distrik, tasol planti manmeri ol i save moa long pisin. Na sampela man ol i go long skul, ol i save long inglis.

Mi tingting 13 distrik, manmeri ol i save long pisin tok ples 5-pela distrik tasol ol i save long tok Motu. Olsem na mipela i mas tingting long pisin skul na helpim ol pipel ol i no save rit na rait.

Em tasol wari bilong mi husat i laik bekim orait, raitim i go long niuspepa Wantok.

Henry Siambugla
Gembogl/Chimbu.

MERI TAKIS O NOGAT?

Dia Edita.- Nau mi laik autim wanpela wari bilong mi i go long yupela.

Ol wantok mi laik save gut long dispela tok bilong kaunsil takis.

Ol i tok ol meri mas takis tu. Long Yaua Lokal Gavman Kaunsil ol i tok, ol meri i no inap long takis, long wanem ol i no wok mani.

Na long Arabaka Lokal Gavman Kaunsil i tok ol meri i mas takis.

Mi laik save long dispela tok bilong Arabaka Lokal Gavman Kaunsil?

Ol Kaunsil yet i putim dispela lo o kiap yet i putim dispela lo?

Na long Yaua Lokal

Gavman Kaunsil i tok meri i no ken takis. Olsem wanem, Arabaka i gat arapela kain Lokal Gavman Kaunsil na Yaua i gat narakain Lokal Gavman Kaunsil? Olsem na ol i gat narakain lo?

Mi save tingting olsem olgeta Lokal Gavman Kaunsil i gat wanpela kain lo tasol.

Bikpela mani ol i bin lusim na i no gat wanpela samting i kamap liklik, no gat tru.

Bipo ol kaunsil i bin grisim ol man long baim bas na bas i go bagarap pinis, na hatwok bilong ol man i lus nating.

Man i gat wari long dispela tok, rait tasol long Wantok.

Mark Tikot,
Bunapas.



MARASIN SOIM GUTPELA ROT

Dia Edita.- Yumi ol meri i mas tingting gut pastaim na rait i go long Wantok Niuspepa.

Mi laik stretim tingting bilong Theresa E. Iriki long Bogia long Madang Distrik.

Yes, Theresa yu bin stretim tingting bilong Marasin Paite, tasol ating yu no gat sem tru na yu raitim ol dispela tok.

Sapos yu gat tingting meri bilong Papua Nu olsem mi, bai yu i no Gini i go long arapela inap rait, tasol yu a-kantri. ting sem bilong yu dok i kaikai pinis.

Mi ting susa marasin bai yumi meri i marit i soim gutpela rot long waitman bai i mekim yumi ol meri bilong Pa-im wanem? Sapos dispela pua Nu Gini. Tasol yu waitman i maritim yu bekim tok bilong em na Theresa na yutupela i i no stret. karim 3 o 4-pela piki-nini na man bilong yu i

Wantok mi pilim olsem go long as ples bilong yumi meri i maritim ol em na lusim yu wantaim man long Papua Nu Gini ol pikinini bai ol pikinini yet em i gutpela, tasol inini bilong yu bai i bilong wanem yumi save painim graun olsem wanem? Sapos yumi

maritim ol waitman na Mi ting bai ol i kamap stilman na bai ol i bihain long taim bilong bagarapim kantri tasol. independens, ol man bi-Mi ting bihain yu i long Haus i putim lo laik bekim pas, yu mas long i no ken kisim ol tingting gut na rait i

go long Wantok. Mi ting yu wanpela i save skirap long maritim waitman.

Yes wantok Theresa E. Yu ting mi krosim yu, tasol yu no ken kros, mi stretim tingting bilong yu wantaim mi yet.

Sapos yu pilim nogut orait, rait tasol i go long Wantok.

Mrs.K. Wamak,
Goroka.

BRAUNMAN NA WAITMAN

Dia Edita.- Hia mi gat sampela askim. Ol husat man i wok long gavman olsem plisman, Patrol Ofisa, ol Lo Man o nogat? Ol man husat i holim bikpela wok long gavman?

Ol bilong helpim ol viles pipel na soim gutpela pasin na i stap olsem eksampel o nogat?

Dispela askim em i no bilong ol braunman tasol, em i bilong ol waitman tu. Em tu i bilong ol husat i save patrol long ol viles nabaut.

Sampela pasin mi lukim ol i mekim i no bin stret long ai bilong mi na mi wari tru na mi laik save na askim. Planti saveman i save tok na krai tru long selp gavman na independens. Ol wantok lain, yumi sitisen bilong Papua Nu Gini, yu holim tru as bilong lo. Yumi kisim lo na yumi mas bihainim tru. Nogut yumi mauswara na bihain yumi lus tru tumora. I gutpela tru yumi tingim gut na inap sanap na strong long mekim kantri bilong yumi i ran gut.

Sapos yumi soim ol lo nogut na eksampel nogut. Yupela i ting wanem?

Mi save tru ol i kam pilai wantaim yu na ol i brukim lo. Yupela i ting em i asua bilong husat i brukim lo?

Asua em hia. Asua bilong pipel husat bilong yumi i soim eksampel nogut pinis.

Husat man i laik stretim mi long askim, stretim tasol i go long Wantok Niuspepa.

Mr. K.P. Irompe
Usino/Madang.

TAMBU SEVEN DE

Dia Edita.- Nau mi laik autim wanpela wari bilong mi i go long yupela ol wantok.

Mi bin lukim planti 7 De Misin i tambu long dring kopi na ti.

Mi laik save gut long dispela tupela samting ol i tambu long em.

Plis yu husat 7 De boi yu laik bekim ol dispela askim long mi, plis yu mas kliaim tru ol dispela as bilong ol samting yupela tambu long em.

Na tu ol i tambu long pik, pukpuk, palai, na sampela arapela abus mi no save long nem bilong ol.

Na bilong wanem ol i yusim kau na dring susu bilong en. Kau i wanpela kain olsem pik na i gat 4-pela lek.

Mi tu mi bin go long skul bilong 7 De Misin tasol mi no bin klia long ol lo na mi ranawe long skul. Mi tok ol samting hia yupela i tambuim, ol i gutpela abus bilong mipela olgeta pipel bilong Papua Nu Gini.

Mark Tikot,
Bunapas/Ramu.

TU MINIT TINGTING

YU LAP LIKLIK

"Oltaim yupela i mas tingting long samting bilong antap. Yupela i no ken tingting long samting bilong graun." (Kolosi 3:2.)

Sampela taim yumi gat sampela wantok, tasol yumi oltaim i no wanbel long ol. Na yumi save tok kros o yumi luk pes tasol. Sampela taim i gat toktok nating i save kamap long ol manmeri taim ol i no gat wok. Dispela em i no gutpela.

Planti taim yumi laik daunim nem bilong arapela man. Long ol dispela taim yumi ken tingting antap na lusim pasin bilong graun. Planti taim yumi yet putim lo bilong ol manmeri i mas bihainim. Long ol i mas wokabaut olsem na ol i mas tingting olsem.

Tasol yumi lusim tingting, long wanem, God i no wokim tupela man o tupela meri i wankain. Olgeta i gat pasin na tingting bilong ol wan wan. Yumi ken askim God long givim pasin bilong lap liklik na amamas long yumi bai yumi ken lap na amamas long yumi yet na long arapela tu. Orait yumi ken stap wanbel.

Ai bilong yumi i mas lusim graun na sut stret long Kraist na diwai kros bilong em. Sapos olsem bai ol liklik samting i stap namel long yumi manmeri long graun bai pinis.

Dispela naispela tingting i kam long wanpela nupela buk ol i kolim WOKABAUT WANTAIM JISAS. Pasto Yanadabing Apo i edita, na Kristen Buk Senta, Madang i save salim. I gut yu kisim wanpela.



stori bilong tumbuna

Akis i Kam Bek


Wanpela man, nem bilong em Maima Poropaungabia, i kisim akis bilong em na i go long bus.

Na em i lukim wanpela pikinini bilong karuka i stap antap long diwai na em i seksek na em i go antap long karuka, wantaim akis bilong em. Na em i katim.

Tasol wanpela wara i stap daunbilo na em i no lukim. Na akis bilong em i slek na pun-daun i go long wara na man hia i pasim ai na kam daun isi isi.

Em i kam long arapela hap na em i krai krai na rapim graun long pes bilong em bilong akis bilong em. Na em i kam long haus bilong em.


Long nait masalai bilong wara i kisim akis




na haitim long lip bilong tanget. Orait, na em i kisim akis i kam na putim long han bilong Maima Poropaungabia.

Long moning em i kirap na lukim long han bilong em. Tasol wanpela samting i taitim rop na putim long han bilong Maima Poropaungabia. Na em i seksek na rausim lip bilong tanget. Tasol insait akis bilong em i stap. Na em i seksek nogut tru em i kisim bek. Na em i laikim tru tumas.

Peter Kumai
Mul/Gumine (Chimbu)



WOKABAUT WANTAIM JISAS BUK 2 NAU EM I REDI



WOKABAUT WANTAIM JISAS em i wanpela gutpela buk tru na em i bin kamap long hatwok bilong yumi Papua Niugini yet. Pasto Yanadabing Apo em i wok edita long en. Dispela buk em i bilong helpim olgeta Kristen famili long lotu bilong ol long olgeta de.

Na dispela buk em bai i kamap 4-pela hap inap olsem tri mun tri mun. Olsem na nau dispela em i namba tu hap inap yu stat long Epril i go inap long Jun na bai i pinis.

Yu ken baim dispela buk long dispela tripela buk stua:


KRISTEN BUK SENTA

.... P.O. BOX 222 MADANG

.... P.O. BOX 215 KUNDIAWA

.... P.O. BOX 718 LAE

Oda No. 121...Prais: 30¢



SKULIM DOK

Bipo tru ol tumbuna i holim planti dok. Wanpela man inap gat planti dok. Man i save baim pikinini dok long bikpela pik. I no liklik pik.

Dok em i asua tru bilong painim planti kapul. Man i gat planti kapul moa.

Olgeta dok i wok long painim kapul long hap bus i stap nating. Kapul i save slip long graun, wokim grin lip na slip.

Ol man i save kisim liklik dok na ol i kilim liklik rat na givim long dok. Ol pipel i save mekim olsem inap tu o tri o foa mun; na dok i go bikpela.

Sapos ol i kukim rat na i go long bus, ol i haitim rat insait long diwai. Ol i pasim dok long rop. Haitim rat pinis, ol i lusim dok long rop. Na dok i go painim rat wantu. Olsem tu ol

i lainim ol long kilim kapul kwiktaim.

Bipo ol tumbuna i bin holim dok na ol i amamas. Nau mipela holim ol liklik dok tasol. Ol waitman i gat planti kain kain dok. Ol kanaka i lukim na ol i wari tumas long waitman i gat naispela dok.

Robert Laik
Yampu, Wabag.


ATING YU SAVE?

Gavman i lukautim 5-pela lokal saveman bilong dispela ol dipatmen bilong gavman: Didiman, Edukesen, Nius na Toksave, Helt, na Sosal Developmen (kuskus tasol)

Man i ting save bilong em inap i mas rait i go long Pablik Sevis Bot long Port Moresby bipo long 24 de bilong Me.

Inap nau ol waitman i bin holim ol dispela wok tasol nau gavman i laikim ol lokal man,

SWIT MOA!



Dispela marasin bilong klinim tis, ol i kolim long "COLGATE". Smel bilong em i swit moa yet. COLGATE i nap long rausim ol liklik pipia bilong kaikai i pas long tis bilong yu. I klinim tu retpela pipia bilong buai long tis.

Sopos yu usim COLGATE bilong klinim tis bilong yu long olgeta dei, bai tis bilong yu i stap klin oltaim.

Yu nap painim dispela marasin COLGATE bilong klinim tis long planti stua long hap yu stap. Em i gutpela marasin tru bilong lukautim oltaim tis bilong yu.

Sopos yu go long stua yu askim long COLGATE marasin bilong klinim tis.

ATING YU SAVE

Dipatmen bilong Nius na Toksave (D.I.E.S.) i gat tupela nupela film i soim stori bilong Papua Nu Gini.

Wanpela em i bilong Nesenel De 1972 na narapela i soim pasin bilong ileksen bilong 1972.

Bihain liklik bai i gat narapela film long pasin bilong bikpela singsing long Chimbu.

Long yia 1972 ol kaunsil bilong Papua Nu Gini i bosim 19 bisnis bilong transpot, 3-pela bot bisnis, 12 somil, 16 maket, 7 bakstua, 2 bisnis kaving na 50 narakain ol bisnis.

Dokta John Guise i no laikim pasin bilong gavman long tokim ol kiap na arapela ofisa bilong gavman ol i pinistaim nau na i ken go bek long ples.

Sampela man hia i bin wok inap 30 yia na i gat bikpela na gutpela nem tru. Em i tok olsem yumi no ken bosim ol nabaut tasol na soim ol yumi blakskin i antap nau.

Long Port Moresby ol i mekim 270 kain kain wok long mun Mas. Dispela ol wok inap long \$26,650.01 dispela samting ol i bin prinim bilong olgeta dipatmen bilong gavman.



KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea



Tutt Bryant Pacific Limited

LAE-MADANG-PORT MORESBY-GOROKA-RABAU-KIETA

DOK MASKI



Planti lang i raunim het bilong Maski na ol i singsing planti na ai bilong em i raun.

BEAT IT!




Maski i les pinis na em i bikmausim ol lang: Yupela ol lang i klia. Goan, yupela i klia.

OKAY! IF YOU WANT TO BE A LONER!



Orait, ol lang i go nau na ol i tok: Mipela pren bilong yu i go nau. Yu ken stap wanpis nau.



BAIBEL NAU LONG TEPRIKODA

Poto i soim Pasto Euan Fry bilong Canberra na Mista Andrew Taylor bilong Lae i lukim wanpela kaset i gat hap bilong Baibel long en.

Nupela tingting em hia, long putim ol hap bilong Baibel long teprikoda olsem na ol man i no save rit i ken harim. Na ol i bin painim wanpela nupela rikoda tu, i no gat bateri long en. I gat wanpela spring tasol, yu taitim na em i ran. Em i kostim faiv dola (\$5) tasol.

Long teprikoda tu yumi inap hariapim tru pasin bilong tanim Baibel long ol tok ples. Baibel So-saiti i laikim ol lokal pipel tasol i tanim tok; ol i save pinis. Tupela lokal tanimtok inap long pinisim Nupela Testamen insait long wanpela yia.

KRAIS NA KUMUL

wanpela poem bilong Ista

Pastaim em i luk nais tumas olsem pisin bilong paradis (kumul).

Skin bilong em, pes bilong em, na klos, em i nais tru na i luk olsem ol kangal bilong kumul.

Wanpela naispela na pulap long kala pisin bilong Nu Gini.

Em husat em i no save kros, em i no save hambak, olsem kumul i no save hambak long bilas bilong em,

na i no save pait bek olsem man bilong Papua Nu Gini.

Em husat i save mekim gut tasol long ol man bilong graun?

I no gat rong long em, tasol ol i kilim nating long bilas bilong em tasol,

olsem ol man bilong Papua Nu Gini i save kilim kumul nating tasol long bilas bilong em.


Ol soldia i pilai kat long klos bilong em long winim,

olsem ol Papua Nu Gini i save salim ol kangal bilong kumul.

- Pancratius Lakot, Fom 4
Bogia Cath. High School
Malala

OL I TOK: Bipo ol leta O.H.M.S. long ol skin pas bilong gavman i min: "On Her Majesty's Service." Nau i min: "Ol Harim Michael Somare".


SUNLIGHT sop i wasim ol samting klin tru; ol doti i raus tru.




Putim ol doti klos i go daun insait long wanpela baket wara.




Rapim ol klos long dispela sop ol i kolim SUNLIGHT. Em i min: lait bilong san.




Nau wasim ol klos insait long dispela wara i gat sop long en. Bihain kapsaitim doti wara i go.




Wasim klos wantaim moa long nupela klinpela wara.



Nau yu lukim: ol i klin tru. Sop SUNLIGHT i bin rausim olgeta doti pinis. Go kisim sampela SUNLIGHT sop nau.





KOMYUNIKESEN

Dispela bikpela tok KOMYUNIKESEN em i min olgeta samting yumi pipel i save mekim o wokim bilong go ausait long bodi bilong yumi yet na painim ol nara-pela man.

Yumi save soim ol tingting bilong yumi long ol toktok, long ol buk, long rait, long ol singsing. Olsem tasol ol arapela man i ken save long tingting bilong yumi. Na olsem tu yumi ken kisim tingting bilong ol arapela man.

Bipo tumbuna bilong yumi i no save rit na rait na tok long telipon. Ol i wokabaut isi isi tasol long rot bilong bus na ol i karim ol hevi samting long ol bilum bilong ol. Bipo sapos yumi laik salim tok, yumi salim lip target o sutim garamut.

Tok i no go longwe. Ol manmeri tu i no save go longwe long ples. Nogat. Olsem tasol ol i no bin kisim bikpela save.... ol i no bungim planti arapela man. Ol i hait i stap long ples o hap bilong ol tasol.

Tude Papua Nu Gini i bin go het kwiktaim tru

bikos planti samting i bin kam pinis bilong bringim ol nupela aidia i kam long yumi. Em hia: redio na buk na skul na rit na rait na ka na trak na sip na balus na bikpela rot na telipon.

Biknem bilong ol dispela kain samting em hia: **K O M Y U N I K E S E N .**



Ol komyunikesen i gat bikpela strong bilong tanim bel na givim na stiaim tingting bilong ol man. Yumi mas yusim ol dispela samting bilong mekim gutpela wok tasol, i no bilong

bagarapim na paulim nabaut laip bilong ol manmeri.

Ol buk na redio na skul na niuspepa i mas skulim ol pipel long bihainim tasol olgeta samting i tru, i gut, na i nais....olgeta samting God i laikim.

Long Sande, 3 Jun, olgeta manmeri bilong graun i ting long komyunikesen.

Sapos ol man nogut i bosim ol redio na nius, bai ol tok giaman na ol piksa i gat sem i paulim Papua Nu Gini. **YUMI MAS LUKAUT GUT.** Nogut ol yet i win.





BISNISMAN GO HET GUT

Mista Rengai Alu bilong Hula long Port Moresby i stap wok long Lae i kisim \$1,500 sek mani. Em i bin mekim kontrak wantaim Pablik Wok Dipatmen, long wokim 3-pela haus. Ol haus hia i gat 3-pela rum bilong slip, waswas rum, haus kuk, na i gat veranda. Mista Rengai i gat 4-pela man i helpim em long wokim ol dispela haus na i pinis long 12-pela wik tasol.

Ol i bin makim pinis long em, long wokim moa 3-pela haus long wankain ples tasol. Mista Alu bai i laukautim wanpela saveman long wok kapenta long kam long wok wantaim em. Mista Alu i bin stap long Lae inap 11-pela yia olgeta.

HETMAN BILONG OL BROTKAS

Minista bilong Nius na Toksave, Mista Paulus Arek i tok olsem, Mista Luke Sela bilong Manus bai i kisim ples bilong Mista Trevor McGillivary.

Mista Luke Sela bai i kamap namba tu edita bilong Dipatmen Bilong Nius na Toksave long Port Moresby.

Mista Luke Sela em i gat 30 yia na em i stat wok wantaim Dipatmen bilong Nius na Toksave long yia 1962. Em i bin go pinis long Australia na bihain em i kam bek long Papua Nu Gini, em i wok long A.B.C. na em i joinim dipatmen hia long yia 1971.

Long taim em i bin stap insait long dispela wok, em i bin mekim wok bilong ol nius na tu em i bin stadi long kamap olsem nius edita.

Bipo Luke Sela i go stadi long Australia, em i bin stap inap 4-pela




MISTA LUKE SELA

mun long C.P.T.S. long mekim stadi na trening bilong em.


Mista Paulus Arek i tok olsem, em i gat bikpela amamas long Mista McGillivary long wok wantaim ol lokal ofisa na soim na helpim ol long ol wok bilong nius.

Mista Paulus Arek i tok tu olsem, em i klostu bai ol i makim namba wan man long dispela wok bilong brotkas nius rum long Port Moresby.


OMO i mekim klos i lait tru. Putim OMO long wanpela dis.




Nau paitim wara long han bai spet i kamap. Nau wasim klos




Nau kapsaitim wara antap long Omo. Kolwara i orait tu



I pinis, yu rausim doti wara





Wasim klos gen long klinpela wara nating. Maski sop.



Orait, nau yu lukim: klos i lait tru. Tenkyu long OMO sop



Vokesenel Skul i Go Het Moa Yet



Antap hia yu ken lukim poto bilong insait na ausait bilong wanpela nupela Yut Senta bilong Finschhafen Vokesenel Senta.

Em i ples we ol yangpela pipel i ken bung na lukim piksa na muvi.

Namel long poto Mista Taylor, hetman bilong Vokesenel Skul i woka-baut klostu long wanpela masin i save pilai olkain musik sapos yu putim 5 sen insait long en. Long namba wan de yet, ol pipel i bin putim 5 sen insait long dispela masin inap long 2240 taim; em inap long \$112.00.

Lokal Gavman Kaunsil bilong Finschhafen i bin givim \$2000 bilong helpim dispela senta. Na sampela soldia bilong woa i bin givim mani tu.

Dispela Vokesenel Senta i bin wokim plan-ti arapela samting tu. Ol treni wantaim hetman bilong ol, Mista Smith, i bin wokim bris simen bilong ol sip, wanpela stua i stap antap long wanpela trak na i save go i kam long olgeta ples, wanpela faktori bilong wokim ol bikpela blok ais, na wanpela stua bilong salim olkain bilas ol i bin wokim long ol liklik rip bilong solwara. Ol skulboi yet i ranim dispela stua.




Mipela helpim kantri asde tude tumora

Ol balus bilong mipela i save flai moa long 200 taim long wik. Mipela i gat sampela pailot i bin draivim balus inap 18,000 aua.

Mipela save flai i go long 40 ples Olsem tasol, mipela i pilim mipela balus insait long olgeta hap bilong Papua Nu Gini. i save moa long flai long Papua Nu Gini.

Na wanem, em i ples tru bilong mipela Ansett.




Serving the country-yesterday, today & tomorrow



ANSETT AIRLINES OF PAPUA NEW GUINEA
in conjunction with ANSETT AIRLINES OF AUSTRALIA

AP112

SAVE LONG OL MEMBA



MISTA THOMAS KAVALI
(Jimi Open)

AS PLES: Maegmol, (W.H.D.)

OL KRISMAS: 28

LOTU: Katolik

SKUL: Em i pinisim Praimeri Skul na em i go tren olsem fama long Madang Fama Trening Skul.

WOK: Woda Plis, memba bilong Jimi Lokal Gavman Kaunsil, na Siaman bilong Nu Gini Nesenel Pati.

LUKIM PINIS: B.S.I.P., Nu Hebrides, Fiji, na Australia.

FAMILI: Em i marit na i gat 1-pela pikinini.



MISTA PAULUS AREK
(Ijivitari Open)

AS PLES: Wanigela, (N.D.)

OL KRISMAS: 43


LOTU: Englikan

SKUL: Pinisim 10 yia long Englikan Misin Skul, 5 yia long Sogeri Haikul, na 2 yia Tisa Trening.

WOK: Tis inap 17 yia olgeta. Presiden bilong Popondetta Wokes Klap, na Federesen bilong (PNG) Wokes Asosiesen. Em i namba wan man long makim P.N.G. long stap insait long Saut Pasifik Komprens long Noumea long yia 1971. Siaman bilong Selek Komitti long lain bilong Konstitusenel Developmen long namba tu Haus Asembli.

LUKIM PINIS: Australia, Amerika, na planti arapela kantri.

FAMILI: Em i marit na i gat 8-pela pikinini.



MISTA GIDEONG APENG
(Huon Gulf Open)

AS PLES: Buakap, (M.D.)

OL KRISMAS: 49

LOTU: Luteran

SKUL: Pinisim standet 6 tasol na bihain em i go long bikpela Baibel Skul long Yabim na tren olsem tisa.

WOK: Bipo em i tisa na doktaboi. Long 1965 i kam inap 1972, em i sekretari bilong Luteran Misin.

LUKIM PINIS: Australia.

FAMILI: Em i marit na i gat 7-pela pikinini.



MISTA TURI WARI
(Ialibu-Pangia Open)

AS PLES: Ialibu, (S.H.D.)

OL KRISMAS: 39

LOTU: Yunaitet Sios

SKUL: Em i no bin go long wanpela skul.

WOK: Long yia 1955, i kam inap long yia 1968, em i stap man bilong tanim tok long Ialibu. I gat wanpela banis kau, na wanpela pasindia ka.

LUKIM PINIS: Australia.

FAMILI: Em i maritim 2-pela meri na em i gat 8-pela pikinini.

21 VILES BAIM BOT



Long Lae, 21 viles ol i baim wanpela nupela bot. Nem bilong dispela bot em i M.V. Tedi. Longpela bilong em i 45 fut. Ol pipel i wok inap 2 yia olgeta, pastaim ol i bin baim dispela bot. Em i kostim ol \$13,472 dola long baim. Ol i bin kisim \$4,000 dola long wanpela sosaiti bilong ol i kolim, Dzia Bui Otao Sosaiti. Arapela \$9,000 dola sosaiti i bin dinau long (P.N.G.) Developmen Beng. Ol pipel i ting olsem, sosaiti bai bekim dinau mani hia bihain long 2-pela yia.

Mipela inap wokim

OLKAIN SAMTING LONG KANDA

Autim laik bilong yu tasol


olkain sia
olkain tebol
olkain basket
blain pangal

Mipela ken salim long sip o balus. Rait tasol i go long:


CANE INDUSTRY PES-AITAPE, W.S.D.

Bisnis bilong ol lokal pipel stret

lukim ol prais hia



Yu no gat lektrik? Maski, samting nating. Kisim tasol dispela lam kerasin: PETROMAX. Em i win tru, i lait olsem san.



ORIGINAL
Petromax
MADE IN GERMANY



TOYO

TOYO taia i nambawan tru bilong olkain ka, trak, bas.



Yu laik ol poto bilong yu i kamap klia na kala bilong ol i lait tru? Putim AGFA film insait long kamera bilong yu.

DOLMAR so inap long mekim wok bilong tenpela man. Yu malolo; em i wok.



BRECKWOLDT & CO. (NG) PTY. LTD.

PORT MORESBY · MADANG · RABAUL
LAE · MT. HAGEN · WEWAK · KIETA


PANGU NA YUNAITET RESIS LONG TOKTOK



Long mun i go pinis, Mista Paul Langro, memba bilong Wes Sepik na tokman bilong Yunaitet Pati, em i bin autim sampela tok na ting bilong em egens long pasin bilong Pangu Pati na gavman.

Em i pasin bilong Yunaitet Pati na lida bilong ol, Mista Matias Toliman, em i mas tokaut long olgeta samting em i ting i no stret long gavman, bai gavman i mas tingting gut long ol lo na wok bilong em.

WANTOK niuspepa i bin go long ofis bilong Michael Somare na askim em long wanpela tokbek. Nau mipela prinim tupela tok.



Mista Langro i tok olsem:

..... Mi les pinis long pasin bilong Pangu Pati long toknogutim na tok baksait long Yunaitet Pati. Ol Pangu i tok mipela ol boi bilong waitman tasol, na mipela bihainim tok bilong ol tasol. Dispela tok i no tru. Em Pangu yet i gat planti waitman i stiaim tingting bilong ol. Wanpela misis yet i raitim PANGU PATI NIUS bilong ol.

..... Olgeta tok bilong Yunaitet Pati i kam long ol lokal memba bilong komiti bilong lida bilong mipela, Mista Matias Toliman.

..... Yunaitet Pati em i moa bikpela long olgeta arapela pati long Papua Nu Gini. Em oltaim i bin bihainim pasin bilong helpim ol pipel. Olsem ol pipel i mas insait long en.

..... Yunaitet Pati i tok, ol pipel yet i mas makim taim bilong independens. Tasol gavman i bin daunim dispela tingting long Haus Asembli; em i bin tanim bel bilong sampela memba na nau ol dispela memba i no moa vot long bihainim laik bilong ol pipel bilong ol. Bilong dispela mipela Yunaitet Pati i no laik ol memba i vot; ol pipel yet i mas vot long tok bilong independens.

Mipela i laikim tumas bai ol studen bilong ol bikpela skul i lukim na glasim gut ol tingting bilong mipela. Ol dispela man bai i lida bilong kantri bilong yumi na pati bilong mipela em yet i pati i pait nau long givim strong long han bilong ol. Mi pret gavman nau i abrusim ol pipel.

Mista Somare i bekim tok:

..... Mista Langro i yangpela yet insait long Yunaitet Pati; em i no inap sanap olsem tokman tru bilong en. Em i save raun planti tumas.

..... I tru mipela i gat niuspepa, tasol mipela yet i kisim mani long poket bilong mipela bilong ranim. Mipela i no gat sampela bisnisman i givim mani nating long mipela. Nogat.

..... Sapos Mista Langro na ol ilektet memba bilong komiti bilong ol, ol yet i stiaim Yunaitet Pati, mipela i amamas tru. Em i namba wan taim ol i mekim olsem. I gutpela tru.

..... Mista Langro i tok gavman i stap longwe long ol pipel. Em i no tru. Gavman nau i wok moa long strongim ol eria autoriti. Em i namba wan taim long stori bilong dispela kantri yumi lukim gavman i tingting planti long ol man bilong ples yet, na i laik helpim ol.

..... Em i wok bilong ol lida bilong nupela kantri olsem Papua Nu Gini ol i mas soim rot long ol yangpela pipel. Ol lida yet i mas tingim gut ol as tok na as tingting bilong gavman bai ol yangpela manmeri i ken bihainim.

Ol Yunaitet lida i mas soim tru wok na save bilong ol long wanem samting ol i bin mekim tru. Olsem tasol ol studen i ken bihainim ol. Langro i mas lukaut em i no aninit long wanpela blanket bilong ol waitman na ai bilong em i pas. Mobeta em i tromoim dispela blanket pastaim.

PASIN BILONG BAIM WANTOK

Sapos yu stap long skul o long kaunsil o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.

Hia nau yu raitim :

Nem:

Adres :

Mi laikim pepa i kam olgeta taim

Salim i kam long :

WANTOK - P.O. BOX 396 - WEWAK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;


Nem:

Adres:

Salim i kam long :

WANTOK - P.O. BOX 396 - WEWAK

OPIM RAMOAINA KAUNSI



Poto antap i soim 2-pela ofisa bilong Lokal Gavman Asosiesen, Mista Peter Malala wantaim Mista Robin Safitoa.

Dispela poto i stap antap i soim Minista bilong Lokal Gavman Asosiesen, Mista Boyamo Sali, wantaim Minista bilong Helt, Dokta Reupena Taureka, long ailan bilong Duk Yok Ailan long taim tupela i go opim 2-pela bikpela haus long namba 30 de bilong mun Mas long dispela yia.

Long namba 16 de bilong dispela mun tupela i bin kam bek long Papua Nu Gini, bihain long tupela i pinisim 1-pela mun kos bilong tupela long kantri bilong Holan, long lainim moa wok bilong Lokal Gavman.

Mista Boyamo Sali i bin opim nupela haus kaunsil bilong Ramoaina Lokal Gavman Kaunsil, na Dokta Reupena Taureka i bin opim nupela Helt Senta.

Mista Peter Malala i sanap long lephan sait na Mista Robin Safitoa i sanap long raithan sait. Tupela wantaim i wok long bikpela ofis bilong Lokal Gavman Asosiesen long Port Moresby.

Long dipela taim, samting olsem 3,000 pipel olgeta ol i bung long dispela bikpela de. Mista Boyamo Sali i bin tokim ol pipel long helpim kaunsil bilong ol long mekim wok bung wantaim, bai kantri bilong yumi i kamap strongpela moa.

Ating Yu Save

Long bikpela kibung wantaim ol kiap long Port Moresby, namba tu minista bilong bosim ol mani, Mista Gavera Rea i

bin tok gavman i laikim tumas ol lokal gavman kaunsil i ken statim na bosim moa bisnis long hap bilong ol.

Long yia 1972 ol kaunsil i bin bosim 19 bisnis bilong transpot, 12 somil, 16 maket, 7 bakstua, 3-pela bot bisnis, 2 kaving stua, na nara-pela 50 kain kain smol-pela bisnis.

Gavman i laikim tumas bai ol kaunsil i bihain-im pasin ol i gat long ol kantri bilong Afrika. Ol lokal pipel i save winim wan siling long ol kain kain smolpela bisnis olsem: kukim na salim kaikai long maket, wokim su, wokim basket na kaving, katim gras bilong ol waitman, samapim klos.

CATHOLIC CORRESPONDENCE CENTRE

1973

THEOLOGY - SCRIPTURE - MEDIA - LITURGY

Courses for Clergy, Religious, Laity

(Courses in English only.)

POST NOW

for Information Bulletin / No obligation

Director of Studies - P.O. Box 88, Drummoyne, N.S.W. 2047


NAME:

ADDRESS:

Wantok Publications bilong Wewak (P.O.Box 396) i wokim, na Wirui Pres long Wewak i prinim.



Dispela em i poto bilong bikpela kibung moa i Mista Julius Chan, minista bilong ol beng bilong stap long Tokyo long Japan. I gat 500 bisnisman Papua Nu Gini i stap wantaim ol na i toktok long bilong 48 kantri bilong hap bilong Asia i miting. kirapim olkain bisnis long kantri bilong yumi.



WINIM MAN

\$5 dola i wet i stap

5 pela man inap winim wan dola wan dola.

Mekim tasol wanem samting mipela i askim daunbilo hia.

Nau salim i kam long

WANTOK piksa
Box 396, Wewak

Skwea em i wanpela bokis o rum i gat 4-pela banis, na olgeta banis i wankain na wan mak tru.

Yu lukim hamas skwea long piksa long lephan? Raitim namba yu painim pinis.
Nau raitim nem na adres na salim i kam.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.